



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 41. Kalenderwoche – ab 5. Oktober 2008



In dieser Woche philosophiert Sachsenmeyer über das Chemnitzer Wahrzeichen, den „Nischl“ und stellt dabei einen wahrlich ungeheuerlichen Akt von Geschichtsfälschung fest.

## Guguggsei

Das is ja eischendlich e ganz scheenes Ei - dass unsor Marxgobb in Gemnidz eischendlich dor Gobb vom Lenin is!

Lenin is ja dähr, dähn dor deudsche Kaisor aus dor Schweiz rausgehoid und nach Russland eingeschmuggld had, damid dähr dord eene Revoludjon anzeddln dud. Dähr Zar sollde weg, Dähr Zar is dähm deudschn Kaisor e Dorn im Ooche gewähnsn. Un dähr Lenin had das ja ooch gemachd - das mid dähr Revoludsjon, obwohl dor alde Marx gesachd had, dass das erschd gehn dud, wenn de Brodugdsjonskräfd e daderzu reif sinn. Un dann musses off dor ganzn Weld sein. Das had dor Lenin eenfach ignorierd un had im Offdrach vom deudschn Kaisor de Revoludsjon in Russland gemachd. Geschdorm issor dann an dor Siffelis. Dor Lenin.

Ja, un nu had so e Gombjudormensch rausgekrischd, dass unsor Marx e Lenin is. Dähr Gombjudormensch had mid Gombjudor däm Marxgobb dähn Bard abgemachd un de Haare ohm offn Gobb - un baudz, da dud disch dor Lenin anguggn. Sähr finsdor! Mor muss sich das ma vorschdeln - dähr Leff Kärbl, der dähn Gobb gemachd had, dähr had also damals de Genossn vorarschd. Dähr had e feddes Honorar eingeschdrischn un had dähnen een Gobb von Lenin angedrehd, dähn dähr in dor Soffjedunjon nisch mähr losgewordn is. Bard un Haare nann - un alle hamm gegloobd, dass das nu dor Marx is. Na guhd, es had ja keenor von de Genossn dähn Marx jemals zu Gesischde gegrischd. Die konndn ja ooch nisch wissn, wie dähr in dor Werglischkeid ausgesähn had. Naja, un so is das ja ooch sonsd so gewähsn - mid dähm ganzn Marxismus. Da haddn se alle Marx gelähsn, un alle hamm davon geredet, abor wie dähr eischendlich aussähn dud, had keenor rischdisch gewussd. Das, was de Genossn fiehr Marxismus gehaldn hamm, is keenor gewähsn. Das is ja Murxismus gewähsn, wie sich rausgeschdelld had. Odor isses villeischd Leninismus gewähsn?

Meine Gudste sachd immor, wenn dähr Marx erlähbd hädde, wasse in dor DDR mid seinor scheen Dheorie gemachd hamm, da dädde dähr noch heide in seim Grab rodiern wie Fendilahdor. Naja, se meend, dass dähr Marx werglisch e Wissnschafdlor gewähsn is, dähr genau hingeguggd had, wie dor Gabbidalismus fungdsjoniern dud. Un dann had dähr so seine Dheorie gemachd. Abor dähr had doch nisch gewolld, dass da welsche eene Religjon draus machn dun! Eene Religjon, wo mor dran gloom mussde! Un immor widdor die selm Gebähde hährbähdn mussde. Un bloß keene Gridigg an de liehm Göddor, die wo im Zendralgommidee gesessn hamm!

Un es kennde ja gladd sein, dass das von de Genossn ooch Absischd gewähsn is mid dem falschn Gobb. Meine Gudste sachd, dass dähn Marx, wennor noch gelähbd hamm dädde, als erschdn aus dor DDR ausgewiesn häddn. Die hamm ehm dähn rischischn Marx nisch gewolld. Un desvorweschn - e Lenin im Marxaudfid! Da hamm uns de Genossn e Guguggsei ins Nesd geleeschd!

**Eduard Sachsenmeyer**